



UNIVERSITÄTS-
BIBLIOTHEK
PADERBORN

Universitätsbibliothek Paderborn

Widder die kelch Diebe

Bugenhagen, Johannes

Wittemberg, 1532

VD16 B 9473

Nemet/ esset/ das ist mein leib.

urn:nbn:de:hbz:466:1-34042

denn sie schelt en es Egererey/hassens/verfolgens bescheidenen vnd morden/die ire verbot/vomb des Götlichen gebots willen vnserz HERRN Ihesu Christi/nicht wollen halten/ Was hat in doch Christus zu leide gethan/das sie in so aus neide verachten/verwerffen/verfolgen vnd schenden/inn seinem gebot vnd befehl vom Sacrament. Er wirds die lenge von in nicht leiden/wollen sie in nicht annemen zu einem seligmacher/vnd lassen sein Euangelion vngemeistert vnd vnuerfolget/ sol müssen sie on iren danck/in annemen/zu einem gestrengen Richter/ Das gehet denn nahe dem hellischen sewr zu/ Denn er ist gesetzt zu einem Richter / vber die lebendigen vnd die todten/ Amen.

Nemet/esset/das ist mein leib.

Zum andern / Christus nimpt das brod inn seine hand/ dancket/ vnd gibts seinen Jüngern/vnd spricht/ Nemet hin vnd esset/das ist mein Leib/ der fur euch gegeben wird. Er spricht ia nicht/ Nemet hin vnd esset/ vñ trincket zugleich/ Oder/ Nemet hin vnd trincket/ oder saugtet mein blut/ aus diesem brodte/ das ich gebe/ odder aus diesem meinem Leibe/ den ich euch im Sacramente gebe. Warumb narret man vns denn mit menschlichen gedanken/ wider den klaren befehl Christi? Er saget auch/ Das ist mein Leib/ vnd saget nicht/ Das ist mein Leib vnd blut zusammen/darumb dürfft jr meinen kelch nicht trincken. Nein/ Er befehlet es viel anders/ Es stehet alhie alles auff dem befehl Christi/vnd nicht auff menschlichen gedanken.

Ja/ sagestu/ So möchten die menschen gedencen vnd glauben/ das der Leib Christi im Sacrament/ on blut were? Antwort/ O welch eine grosse fahr erdencken alhie vnser Papisten vnd Antichristen/ vnd ire sonderliche

sonderliche liebe/ die sie zu den menschen haben/das ist/
zu Judas beutel/dringet sie dazu/das sie ia niemands la- Menschen ge
ffen inn diesem stücke irren/denn sie künden es sonst für dancken wid
Gottes gerichte nicht verantworten/sie müssen ia sorgen der Christus
für jr schifflein/Darumbgedencken sie seer vleissig/doch befehl.
mehr was menschen gedencfen/denn was Christus be-
fihlet/vnd sprechen/Die menschen möchten gedencfen
etc. So höre ich wol/Wenn die menschen sonderliche ge-
dancken kriegen/die in nicht befohlen sind/odder etwas
glauben on Gottes wort/wie alhie in dieser sachen/so sol
man vmb solcher menschlichen gedancken willen/vñ vmb
solchē beyglauben/der jenigen / die sich nicht an Christus
wort halten/schlechts darnider schlagen vnd mit füßen
treten/ den gnediglichen befehl/ der Göttlichen. Maie-
stet vnsers lieben H. Ern Ihesu Christi/vnd den selbigen
verbieten/ als Ketzerrey mit dem Bann/ vnd mit weltli-
chem schwerdt/ als sonst eine missethat. Ach Gott/las
dich solchs erbarmen/das das Widderchristliche Regi-
ment so freuelich ist/widder den befehl deines lieben so-
nes vnsers H. Ern Ihesu Christi.

Solche büberey haben die Paffen dem volck furge-
tragen/nach dem Concilio Constanciensi/ inn diesen lert-
ten hundert jaren/vnter dem schein der grossen weisheit
vnd heiligkeit/vnd haben verboten Christus befehl/das
nicht die leut möchten fallen inn einen grossen irthumb/
vnd möchten glauben/das im Leibe Christi im Sacra-
ment/nicht were sein blut/Vnd das sie ia das feste möch-
ten bekrefftigen/denn es war in etwas daran gelegen/
so richten sie auff viel newer fündlin/on Gottes wort/ia
widder den befehl Christi/mit Nonstrantien/Processi-
on/Station/mit des heiligen leichnams Messe vnd köst-
lichem Feste/des heiligen blutsmesse odder Fest/musste
es nicht heissen/das man ia dem tollenvolck so viel spie-
D. geisfechten

gelsfechten möchte machen mit einer gestalt des Sacra-
ments/das sie zu frieden weren/ Denn die Pfaffen stun-
den ihm grosser fahr/ Johannes Zus hat iren vnflut ge-
rürt.

Doch das die Leyen nicht dürfften klagen/das sie
ganz nichts vom kelche behielten/so gab man in gnedig-
lich die Absolution/das ist/schlechten wein aus dem kel-
che zu trincken/wenn sie eine gestalt des Sacraments ge-
nommen hatten/ das wir also den schein behielten vom
ganzen Sacramente/da sie vns so verrhetlich vnd dieb-
lich die helffte abgestolen hetten/ mit irer falschen lere/
vnd Gottlosen verachtung des befehls Christi. Sie ne-
nen es eine Ablution/ das heisst / eine abwasschung od-
der abspülung/ Damit spülen sie ab odder abwasschen
den Leib Christi/den sie empfangen haben. Solche wort
lauten nicht seer Christlich/ Doch wenn sie vns die vnnö-
tige Ablution geben/ denn/wenn wir den kelch des H^{er}
ren getruncken hetten/wie sie selbs thun in irer Segfews-
messe/ so wolten wir deste besser mit ju zu frieden sein/
Aber das Antichristische gebet / das sie von der Ablu-
tion sprechen/wolten wir nicht beten/denn also sprechen
sie/ Absolutio corporis et sanguinis Domini nostri Jesu
Christi/proficiat mihi in vitam eternam. Das vngleubi-
ge Pfaffen volck weis nicht/was es sagt odder für Gott
thut/wie auch alle andere leute vber die ganze welt/die
mit Gottes dienste viel handeln wollen/ vnd doch on
Gottes wort vnd befehl/nicht anders/denn wie die Hei-
den.

Item/noch eine gnade haben vns die Pfaffen auch
beweiset/das sie vns S. Johannes trunck aus irem kel-
che zu trincken geben ihm Weynachten/ vnd dasselbige
aus sonderliche Dispensation vnd gnediger zulassung/
Doch also/das wir mit den henden nicht dran greiffen/
sondern

S. Johan-
nes trunck.

sondern alleine mit dem munde/ Die armen sunder vnd
sünderinnen mochten Christum wol anrühren/denn er war
nicht von den Pfaffen geschmieret/ aber ein geweihter
Kelch ist heiliger/vmb der schmierung willen. Gleube man
freilich/sie geben dir die Ablution oder Sanct Johannes
trunck/ so ist's nicht der Kelch des H. Ern.

Das ist aber wunderlich das sie leren/ Wenn du das
brod des H. ERN issest/ so trinckestu inn dem selbigen
brodte auch/vnd geben vns doch die abspülung/ als auff
ein tröge speise.

Ja/sagen sie/Die Leyen trincken alda das blut Chri
sti geistlich. Antwort/ Wenn wir wollen alleine reden
von geistlichem essen vnd trincken/ so ist's der glaube inn
Christum/ welchen die Papisten nicht wissen/ sondern
hassen vnd verfolgen. Ein recht Christen mensch isset
das fleisch Christi vnd trincket sein blut/ on vnterlas/
tag vnd nacht/ er schlaffe odder wache/ die weil er nicht
auffhöret zu glauben inn Ihesum Christum/ der vmb vn
ser sünden willen mensch worden ist/vns gleich/ doch on
sünde/ inn welchen er getaufft ist/ inn welchem er lebet vñ
stirbet/ Er glaubet/ das er also seinethalben verloren ist/
das er jm selbs nicht gehelffen kan/ noch keine Creatur
im himel odder auff erden/ also das keine menschliche
gerechtigkeit für Gotte kan bestehen/ vnd glaubet darne
ben vnd bekennet frey/ das Gott ein Vater der barmher
zigkeit/ solche vnser verdammis hat gnediglich angese
hen/ vnd vns geschencket seinen eingebornen/ ewigen
Son/ waren Gott/ inn vnser fleisch vnd blut/ von der
Jungfrawen Marien/ durch den heiligen geist/ Vnd ist
also der ewige Son Gottes/ vmb vnser willen/ worden
ein son des menschen vnd hat bey vns inn vnserm fleisch
vnd blut/ verkündiget vnd ausgerichtet den willen seines
himelischen Vaters/ dem er zu vnser seligkeit gehorsam
D ij ist worden/

ist worden/bis jnn den tod/ ia bis jnn den tod des Creuz
zes. Da hat er sein fleisch hin geopffert/ dem Vater fur
vns/ vnd sein blut am Creuze ausgegossen/ zur vergebung
vnsrer sunden/ Also hat er fur vns dahin gegeben/ was er
von vns genommen hatte/ das ist/ sein fleisch vnd sein
blut.

Der isset nu des menschen Sones fleisch/ vnd trin-
cket sein blut geistlich/ das ist/ durch den Geist/ der also
glaubet an den Son des menschen/ das ist/ an die mensch
werdung des Sones Gottes/ das er sich mit dem hertzen
fur Gott darauff verlasse/ das Christus vmb seinet wil-
len ist worden fleisch vñ blut/ das ist/ ein natürlich men-
sche/ Vnd hat sich selbs durch den heiligen geist am creuz
ze geopffert/ zum süßen geruch dem Vater/ sein fleisch
fur vns vnd sein blut/ zur vergebung der sunden/ das wir
fur Got keine ander gnugthuung oder gerechtigkeit solle
wissen. Also glauben in das fleisch vnd blut des menschen
Sones/ der warer Gott ist/ ist geistlich essen das fleisch/
vnd trincken das blut des menschen Sones/ Denn durch
solchen glauben werden wir Christo vnserm Zeilande vñ
mitler/ nicht alleine jnn seinen geist/ sondern auch jnn sein
blut vnd fleisch/ das ist/ jnn den ganzen Christum/ Gott
vñ mensche geistlich eingeleibet/ das wir mit jm eins sind
vnd durch in Kinder Gottes/ er jnn vns/ vnd wir in jm blei-
bende/ gleich wie (nicht geistlich/ sondern natürlich) die
leibliche speise/ die wir essen/ wird verwandelt jnn vnser
fleisch/ vnd der tranck jnn vnser natürlich blut. Darumb
auch der **3 ER** Christus/ da er Johannis. vj. von sol-
chem glauben seiner menschwerdung vnd opfferung redt/
solcher rede des essens seines fleisches/ vnd des trinckens
seines bluts wolt brauchen/ Vnd deutet sich selbs da oft
mals/ das er rede vom Geiste oder glauben an sich/ wenn
nur die leut sehē künden/ vñ weisen seine jünger auff seine
menschwerdung

menschwerdung/ das er sey das lebendige brod/ aus dem
himmel gekommen. Der in isset/ den hungert/ vnd der in trin-
cket/ den dürstet nimmermehr/ vnd der bleibet in jm/ vnd
er jm jm etc.

Er beut in darnach noch brod noch kelch an/ Denn
hette solchs das volck gesehen/ so weren sie besser mit jm
zu friden gewesen/ Denn sie lieffen jm nach/ das sie offter
wolten von seinem brodte essen/ den bauch vol/ wie zu-
vor/ Aber da er alleine die wort furgab/ seiner gnaden/
vnd stellet sich nicht/ als wolte er eine malzeit widder an-
richten/ da wolten sie in nicht mehr hören/ Gleich wie nu-
nunsere Bauchknechte/ die Pfaffen vnd Mönchen thun/
wenn sie vom glauben hören/ das sie gar nicht danon kün-
nen odder wollen verstehen. Wenn Secten/ falsche lere/
schinderey/ vnd allerley misbrauch widder Gottes wort
vnd das heilig Euangelion Christi glaub were/ so hetten
sie des glaubens alzuviel.

Das geistlich essen des fleisches Christi/ vnd das
trincken seines bluts gibt gewis das ewige leben/ vnd kan
nimmermehr vnwürdig geschehen zum verdammis/ als
denn wol vnwürdig kan geschehen das essen des leibes
Christi/ vnd das trincken seines bluts im Sacramente.
Das geistliche essen vnd trincken des fleisches vnd bluts
des menschen Sones/ welches der glaube ist/ wie gesagt/
hat gewis bey sich die Concomitantia/ welche die Pfaf-
fen anff das Sacrament deuten/ nicht aus guter mei-
nung/ sondern das sie damit den Leien wollen verbieten/
was Christus geboten vnd befohlen hat/ Denn der also
mit dem Geiste odder geistlichem essen seines fleisches/
vñ trincken seines bluts/ das ist/ mit dem rechten Christē
glauben/ Christum fasset/ der fasset gewis Gottselbs/
Denn solch fleisch ist nicht vnnütze (als die Sacrament-
schender deuten wollen) vnd solch blut ist nicht vnnützig/
D ij sondern

sondern ist nu ein fleisch des ewigen Gottes Sones/da
durch die welt das leben hat/ Pro mundi Vita/ spricht
Christus/ vnd ist ein blut des ewigen Gottes Sones/ aus
gegossen zur vergebung vnser sünden/ zu einer ewigen ver
jüngung vnd seligkeit für Gotte dem himelischen Vater.
Nach der selbigen Concomitantia/ wenn du also im flei
sche vnd blut Christi ergreiffest den Son Gottes/ so ha
stu auch die ganze Dreyfaltigkeit mit allen gütern Got
tes.

Das geistlich essen vnd trincken/ ist das grosse abent
mal/ das ein mensch/ das ist Christus/ anrichtet/ vnd lie
sse jr viel dazn laden/ das ist/ foddern durch die prediger
des Euangelij/ das sie solten komen/ alle ding weren be
reit/ das ist/ das sie mit dem glauben solche gnade anne
men/ Vnd dürfften gar nichts dazn thun/ sondern alleine
essen/ trincken/ frölich sein von seiner koste etc. Wie sich
aber die welt dagegen stellet/ ist jnn der Parabel des E
uangelij dabey fein abgemalet.

Solch geistlich essen vnd trincken des fleisches vnd
bluts Christi/ mein lieber Pfaffe/ gleich wie es on den
kelch geschicht/ so geschichts auch on brod/ Den es ist der
glaube an den gecreuzigten Christum (der ergert dich/
1. Corinth. 6.) Darumb wenn wir das Sacrament bege
ren/ so gib vns nicht alleine das brod Christi leiblich zu
essen/ weise vns nicht vom kelche des HERRN/ den
wir offtmals trincken sollen/ wie Christus befihlet / auff
das geistliche trincken/ das wir on auff hören stets sollen
trincken/ Den Christus hat vns auch/ so oft wir darumb
zusammen komen/ ein sichtiglich Abendmal angericht/
seines Leibes vnd bluts im auswendigen Sacramente/
vnd befohlen zu essen sein brod/ vnd zu trincken aus sei
nem kelche. Bistu ein Christlicher Priester / so fordern
wir solch Sacrament aus deinen henden.

Aber

Aber das geistliche essen des fleisches/ vnd das trincken des bluts Christi/ des menschen Sones/ welchs nicht an die zeit gebunden ist/ wie die empfangung des leibes vnd bluts Christi im Sacramente/ Sondern geschicht stedts on vnterlas inn den glaubigen/ Welches auch nicht vnwirdig zum verdammis geschehen kan/ als die empfangung des leibes vnd bluts Christi im Sacramente/ sondern ist eine gewisse seligkeit. Das fordern wir nicht aus deinen henden/ sondern es gehöret deinem munde zu/ das du vns predigest/ das wir durch das opffer Christi haben die vergebung der sunden/ vnd alleine durch in einen gnedigen Vater/ vnd das ewige leben. Mit solcher gnaden predigt/ von des menschen son/ gibt vns des menschen Son durch seinen heiligen Geist/ das rechte himelbrod/ sein fleisch vnd blut/ das ist/ sich selbs/ Denn Gott gibt vns durch solche predig des Euangelij Christi den glauben inn Christum/ vnd wir werden Christo eingeleibt/ als gesagt ist.

Darumb weñ wir Christen reden vom geistlichen essen vnd trincken des lebendigen himelbrods/ des fleisches vnd bluts des menschen Sones/ so hadderen wir vns ganz nicht mit den Pfaffen/ wedder vmb das brod noch vmb den kelch des **HERREN**. Aber wenn wir armen gebrechliche sunder das sonderliche Abendmal des **HERREN** wollen halten/ mit sichtbarlichem auswendigem Sacramente/ zu trost vnser seelen/ nach dem befehl vnser **HERREN** Christi/ so lasse man vns essen/ wie Christus gebent/ Nemet/ esset/ das ist mein Leib etc. Vnd man lasse vns auch trincken/ wie Christus gebent/ Trincket alle daraus/ Dieser Kelch ist ein New Testament etc. Der solchs verbieten wil/ der ist ein Widderchrist/ Denn die welt kan solchs nicht weren. Christus
hat

hat uns alda nicht ein trucken Abendmal befohlen on
trincken/Doch dauon nachmals mehr.

On das geistliche essen vnd trincken/das ist/on den
glauben vnd zuuersicht auff den gecreuzigten Christum
sol niemands gehen zum Sacramentlichen essen vnd
trincken/des brods vnd Kelchs Christi/ Aber widder-
umb/ die sunder so sich bekerten/ wie schwach das sie
auch noch sind/sollen offtmals mit solchem glauben an
Christum gerne zum Sacrament gehen/ Denn das Sa-
crament ist jr eigen etc. Dauon habe ich in einem andern
buche tröstlich geschrieben.

Darumb sol man ia wol verstehen/ was fur vnters-
scheid sey zwischen dem geistlichen essen vnd trincken/
vnd leiblichen essen vnd trincken des Sacraments leibs
vnd bluts Christi. Das geistliche essen vnd trincken kan
wol geschehen on das Sacrament/ Aber das leibliche
essen vnd trincken im Sacrament des leibes vnd bluts
Christi sol nicht geschehen/ on das geistliche essen vnd
trincken/ Geschichts aber/ so geschichts unwirdig zum
verdammis. Geistlich vnd Sacramentlich essen vnd
trincken/sol bey den rechten Christen in der empfangung
des Sacraments ungescheiden sein/ wie auch Christus
befehl klinget/ das wir da nicht mit heucheley/ sondern
von hertzen/das ist/ aus dem glaubē/ den tod des Herrn
verkündigen sollen/denn er spricht/Solchs thut zu mei-
nem gedechtnis. Sol ich nu geistlich trinckē on den kelch
des **HERRN**/ so kan ich auch wol nach der gna-
den Gottes geistlich essen/ on das eusserliche brod des
HERRN.

Solich denn das Sacrament verachten/wie jr nu
viel thun/ die sich rhümen/ wenn sie glauben (ia wol) so
dürffen sie des Sacraments nicht. Nein zwar/Denn ich
weis wol/ das Christus seinen armen sundern/ die an in
glauben/

glauben/ vnd nicht den Türcken/ das Sacrament gegeben hat/ Der es verachtet/ der ist ein vnglaubiger/ er sage/ was er wil/ Denn er verachtet Christum selbs im seinem befehl. Wenn man aber das Sacrament nicht haben kan/ so were es ein ander meinung. Solich nu zu zeiten nach dem befehl Christi im Sacrament essen seine leib/ so las mich auch im Sacrament trincken seinen kelch/ denn ein solch Abendmal hat er vns vom Sacrament befohlen/ fur das geistliche essen vnd trincken/ las mich antworten/ wie Paulus saget/ Probet autem seipsum homo etc.

Des gleichen auch den kelch.

Zum dritten/ So stehet auch geschrieben vom Sacramente/ Christus nam auch des gleichen oder nach der selbigen weise/ den kelch/ nach dem Abendmal/ dancket/ gab in seinen Jüngern/ vnd sprach/ Trincket alle daraus/ Dieser kelch ist das Newe Testament im meinem blut/ das fur euch ausgegossen wird zur vergebung der sünden. Hörestu wol?

Das Pfaffen recht gebent/ das alle Christen sollen am wenigsten des jars ia ein mal/ als auff Ostern/ zum Sacrament gehen/ sonst sollen sie nicht mit vns zur Kirchen gehen/ auch nicht auff den Kirchhoff begraben werden. Das deuten nu unsere Pfaffen also/ nemlich/ das die Leyen nur eine gestalt des Sacraments sollen nemen. Wenn wir nu also fragen/ Lieben Pfaffen/ warumb gebietet jr doch solches so gestrenge den Leyen/ vnd sonderlich/ auff die Osterliche zeit? So antworten sie/ Dmb des befehls Christi willen/ Solt ein Christ/ Christus befehl verachten? Recht/ Wo hat vns denn Christus das Sacrament seines leibes befohlen? Sie antwor

ten/